


謝陰雜
宣常詠
侍百
城詩二
詩集十
附詩首
集話



成集書叢

編初

者編主
五雲王

行發館書印務商



謝宣城詩集



3 0645 2172 1

謝朓著

本館據拜經樓叢
書本排印初編各
叢書僅有此本

本傳 蕭子顯南齊書

謝朓字元暉。陳郡陽夏人也。祖述吳興太守。父緯散騎侍郎。朓少好學。有美名。文章清麗。解褐豫章王太尉。行參軍。歷隨王東中郎府。轉王儉衛軍。東閣祭酒。太子舍人。隨王鎮西功曹。轉文學。子隆在荊州。好辭賦。數集僚友。朓以文才尤被賞愛。流連晤對。不捨日夕。長史王秀之以朓年少相勳。密以啓世祖。敕曰。侍讀虞雲自宜恆應侍接。朓可還都。按南史曰。秀之以朓年少相勳。欲以啓聞。朓知之。因事求還。道中爲詩寄西府曰。嘗恐鷹隼擊。秋菊委嚴霜。寄言爵羅者。寥廓已高翔。遷新安王中軍記室。朓牋辭子隆曰。朓聞潢汗之水。思朝宗而每竭。鴛蹇之乘。希沃若而中疲。何則。皋壤搖落。對之惆悵。歧路東西。或以嗚悵。況乃服義徒擁。歸志莫從。邈若墜雨。飄似秋蒂。朓實庸流。行能無算。屬天地休明。山川受納。褒采一介。搜揚小善。捨耒場圃。奉筆兔園。東泛三江。西浮七澤。契闊戎旃。從容讌語。長裾日曳。後乘載脂。榮立府廷。恩加顏色。沐髮晞陽。未測涯涘。撫臆論報。早誓肌骨。不悟滄溟未運。波臣自蕩。渤澥方春。旅翻先謝。清切蕃房。寂寥舊華。輕舟反泝。弔影獨留。白雲在天。龍門不見。去德滋永。思德滋深。惟待青江可望。候歸艗于春渚。朱邸方開。効蓬心于秋實。如其簪履或存。衽席無改。雖復身填溝壑。猶望妻子知歸。攬涕告辭。悲來橫集。南史曰。時荊州信去。侍尋以朓執筆。便成。文無點易。尋以本官兼尙書殿中郎。隆昌初。敕朓接北使。朓自以口訥。啓讓。不當見許。高宗輔政。以朓爲驃騎諮議。領記

083
112/
2:2219

18764

室掌霸府文筆。又掌中書詔誥。除祕書丞。未拜。南史無此句。仍轉中書郎。出為宣城太守。以選復為中書郎。建

武四年。南史無出為宣城以下一十六字。出為晉安王鎮北諮議。南東海太守。行南徐州事。啓王敬則反謀。上甚嘉賞之。

遷尚書吏部郎。朓上表三讓中書。疑朓官未及讓。以問祭酒沈約。約曰。宋元嘉中。范蔚宗讓吏部。朱脩之

讓黃門。蔡興宗讓中書。竝三表詔答。具事宛然。近世小官不讓。遂成恆俗。恐此有乖讓意。王藍田。劉安西

竝貴。初不自讓。今豈可慕此不讓邪。孫興公。孔顛竝讓記室。今豈可三署皆讓邪。謝吏部。今授超階。讓別

有意。豈關官之大小。搢謙之美。本出人情。若大官必讓。便與詣闕章表不異。例既如此。都自非疑。朓又啓

讓。上優答不許。朓善艸隸。長五言詩。沈約常云。二百年來無此詩也。敬皇后遷祔山陵。朓撰哀冊文。齊世

莫有及者。東昏失德。江祜欲立江夏王寶元末。更回惑。與弟祀密謂朓曰。江夏年少輕脫。不堪負荷神器。

不可復行廢立。始安年長入纂。不乖物望。非以此要富貴。政是求安國家耳。遙光又遣親人劉渢密致意

于朓。欲以為肺腑。朓自以受恩高宗。非渢所言。不宥答。少日。遙光以朓兼知衛尉事。朓懼見引。即以祜等

謀告左興盛。劉暄。南史曰。又說劉暄曰。始安一旦南面。則劉渢劉晏居卿。今地但以卿為反覆人。爾。暄陽

謂朓。朓因言有一詩。呼左右取。既而便停。祜問其故。曰。定復不急。祜以為轉已。後祜及弟祀。劉渢。劉晏

俱候朓。朓謂祜曰。可謂帶二江之雙流。以嘲弄之。祜轉不堪。至是構而害之。詔暴其過惡。收付廷尉。與

盛不敢發言。祜聞。以告遙光。遙光大怒。乃稱敕召朓。仍回車付廷尉。與徐孝嗣。祜。暄等連名。啓誅朓曰。謝

朓資性險薄。大彰遠近。王敬則往構凶逆。微有誠効。自爾昇擢。超越倫伍。而谿壑無厭。著于觸事。比遂扇

動內外處處姦說。妄貶乘輿。竊論宮禁。間謗親賢。輕議朝宰。醜言異計。非可具聞。無君之心。既著。共棄之。誅宜及。臣等參議。宜下北里。肅正刑書。詔公等啓事如此。眇資性輕險。久彰物議。直以彫蟲薄伎。見齒衣冠。昔在渚宮。構扇藩邸。日夜從諛。仰窺俯畫。及還京師。翻自宣露。江漢無波。以爲己功。素論于茲。而盡結紳。所以側目。去夏之事。頗有微誠。賞擢曲加。踰邁倫序。感悅未聞。陵競彌著。遂復矯構風塵。妄惑朱紫。詆貶朝政。疑間親賢。巧言利口。見醜前志。涓流纖孽。作戒遠圖。宜有少正之刑。以申去害之義。便可收付廷尉。肅明國典。又使御史中丞范岫。奏收眇下獄。死時年三十六。南史曰。臨終謂門賓曰。寄語沈初。眇告王敬則反。敬則女爲眇妻。常懷刀欲報眇。眇不敢相見。及爲吏部郎。沈昭略謂眇曰。眇尤甚。尙書郎范縝嘲之。卿人地之美。無忝此職。但恨今日刑於寡妻。南史曰。卿人才無慙小。選但。眇臨敗。歎曰。我不殺王公。王公由我而死。南史曰。及臨誅。歎曰。天道其不可昧乎。我雖不殺王公。王公因我而死。眇好獎人才。會稽孔聲名未立。應共獎成。無惜齒牙餘論。其好善如此。眇及殷叡素與梁武以文章相得。帝以大女永興公主適叡子鈞。第二女永世公主適眇子讓。及帝爲雍州。二女竝暫隨母向州。及武帝卽位。二主始隨內還。武皇帝薄讓。又以門單欲更適張宏策子策卒。又以與王志子謹而讓不堪。歎恨。爲書狀如詩。贈主。主以呈帝。甚蒙矜歎。而婦終不得還。尋用讓爲信安縣。稍遷王府諮議。時以爲沈約早與眇善。爲制此。云。

序

南齊吏部郎謝朓長五言詩。其在宣城所賦。藻績尤精。故李太白詠澄江之句而思其人。杜少陵亦曰詩接謝宣城也。余至郡視事之暇。哀取郡舍石刻并宣城集所載謝詩。纔得二十餘首。繼得蔣公之奇所集小謝詩。以昭亭廟、疊嶂樓、綺霞閣所刻。及文選玉臺新詠本集所有。合成一編。共五十八篇。自謂備矣。然小謝自有全集十卷。但世所罕傳。如宋海陵王墓誌集中有之。而筆談乃曰。此銘集中不載。蓋雖存中之博。亦未之見也。而余家舊藏本偶有之。考其上五卷。賦與樂章之外。詩乃百有二首。而唱和聯句。他人所附見者不與焉。以是知蔣公所謂本集者。非全集矣。於是屬之僚士。參校謬誤。雖是正已多。而有無他本可證者。故猶有闕文。鈐版傳之。目曰謝宣城詩集。其下五卷。則皆當時應用之文。衰世之事。其可采者已載於本傳文選。餘視詩劣焉。無傳可也。遂置之。紹興丁丑秋七月朔東陽婁炤題。

謝宣城詩集目錄

卷第一

賦

爾德賦井序

七夕賦奉護軍王命作

杜若賦奉隨王教作

遊後園賦奉隨王教作

擬宋玉風賦奉司徒教作

樂歌

雩祭歌建武二年明堂辭

四言詩

侍宴華光殿曲水奉敕爲皇太子作

三日侍宴曲水代人應詔

思歸賦井序

高松賦奉司徒竟陵王教作

野鴛賦井序

臨楚江賦

三日侍華光殿曲水宴代人應詔

卷第二

鼓吹曲

元會曲

鈞天曲

出藩曲

從戎曲

登山曲

同沈右率諸公賦鼓吹曲名先成爲次

芳樹

當對酒

臨高臺

巫山高

有所思

同前再賦

郊祀曲

入朝曲

校獵曲

送遠曲

泛水曲

沈右率約

范通直

朏時爲隨王文學

王尹丞

劉中書

芳樹

同前

臨高臺

有所思

巫山高

同前

同賦雜曲名

陽春曲

淶水曲

採菱曲

秋竹曲

白雪曲

永明樂

第一

第二

朏

融

約

融

繪

雲

檀秀才

江朝請

陶功曹

朏時爲宣城守

朱孝廉

第三

第四

第五

第六

第七

第八

第九

第十

玉階怨

金谷聚

王孫遊

銅爵悲

江上曲

曲池之水

同謝諮議詠銅爵臺

卷第三

五言詩

將發石頭上烽火樓

答王世子

答張齊興

酬王晉安

暫使下都夜發新林至京邑贈西府同僚

始出尚書省

直中書省

觀朝雨

新亭渚別范零陵雲

始之宣城郡

冬日晚郡事隙

落日悵望

遊山

祀敬亭山廟

賦貧民田

送江水曹還遠館

臨溪送別

忝役湘州與宣城吏民別

移病還園示親屬

遊東田

秋夜

治宅

之宣城郡出新林浦向板橋

宣城郡內登望

後齋迴望

望三湖

賽敬亭山廟喜雨

遊敬亭山

與江水曹至濱千戲

送江兵曹檀主簿朱孝廉還上國

將遊湘水尋句溪

休沐重還丹陽道中

出下館

秋夜講解

春思

冬緒羈懷示蕭諮議虞田曹劉江二常侍

懷故人

夜聽伎二首

京路夜發

晚登三山還望京邑

高齋視事

郡內高齋閑望答呂法曹呂僧珍為齊王法曹

卷第四

直石頭

蕭衍

和蕭中庶直石頭

經劉歊墓下

隨郡王蕭子隆

登山望雷居士精舍同沈右衛過劉先生墓下作并序

竟陵王蕭子良

奉和

虞炎

奉和

柳惲

奉和

沈約

奉和竟陵王同沈右率過劉先生墓

離夜

同前

江丞

同前

王常侍

餞謝文學

同前

同前

同前

同前

同前

和別沈右率諸君

臥疾敘意

和王長史臥病

行園

和沈祭酒行園

北戍琅邪城

和江丞北戍琅邪城

昧旦出新亭渚

沈右率

虞別駕

范通直

王中書

蕭記室

劉中書

王秀之

沈約

江孝嗣

徐勉

和徐都曹出新亭渚

入琵琶峽望積布磯

和

答謝宣城

和何議曹郊遊二首

和王中丞聞琴

夏始和劉孱陵

和王著作融八公山

贈王主簿二首

落日同何儀曹照

新治北窗和何從事

卷第五

奉和隨王殿下

其一

在郡臥病呈沈尙書

劉繪

沈約

和劉西曹望海臺

和伏武昌登孫權故城

和宋記室省中

和王主簿季哲怨情

同王主簿有所思

和紀參軍服散得益

同羈夜集

其二

其三

其五

其七

其九

十一

十三

十五

詠風

詠薔薇

詠兔絲

遊東堂詠桐

同詠樂器

琵琶

箎

謝宣城詩集 目錄

其四

其六

其八

其十

十二

十四

十六

詠竹

詠蒲

詠落梅

詠簷北榭子

王融
沈約

琴

同詠坐上器玩

竹檳榔盤

烏皮隱几

同詠坐上所見一物

幔

簾

席

同前

詠竹火籠

同前

詠燈

詠邯鄲故才人嫁為廝養卒婦

聯句

沈約

王融

虞炎

柳惲

沈約

詠鏡臺

詠燭

詠溪藕

阻雪

紀功曹中園

侍筵西堂落日望鄉

往敬亭路中

還塗臨渚

閑坐

祀敬亭山春雨

謝宣城詩集卷第一

酬德賦并序

南齊

右衛沈以侯冠世偉才。眷予以國士。以建武二年。予將南牧。見贈五言。予時病。既以不獲復。詩四年。予忝役朱方。又致一首。迫東偏寇亂。良無暇日。其夏還京師。且事讌言。未遑篇章。思沈侯之麗藻。天逸固難。以報章。且欲申之賦頌。得盡體物之旨。詩不云乎。無言不酬。無德不報。言既未敢爲酬。然所報者寡于德耳。故稱之酬德賦。其辭曰。

悲夫四游之代序。六龍驚而不息。輕蓋靡于駿奔。玉衡勞于拊翼。嗟歲晏之尠歡。會陰默以悽惻。元武伏於重介。宛虹潛以自匿。覽其物之用舍。相羣芳之動植。弔悴軀於華省。理衣簪而自敕。思披文而信道。散奮激於胷臆。嗟民生之知用。知莫深於知己。彼知己之爲深。信懷之其何已。牽弱葛之蔓延。寄陵風於松杞。指曲蓬之直達。固有憑於原泉。彼排虛與躑躅。又相鳴於林沚。興伐木於友生。詠承筐於君子。矧景行之在斯。方寄言于同恥。求相仁于積習。寓神心于名理。惟敦牂之旅歲。實興齊之二六。奉武運之方昌。觀休風之未淑。龍樓儼而洞開。梁邱煥其重複。君奉筆於帝儲。我曳裾於皇穆。藉風雲之化景。申游好於蘭菊。結德音而爲佩。帶芳猷而爲服。援雅範以自綏。懿前修之所勸。昔仲宣之發穎。竇中郎之倒屣。及士衡

之籍甚。託壯武之高義。有杞梓之貞心。協丹采之輝被。伊吾人之陋薄。雖黼藻之何真。惟風雅之未變。知雲網之不廓。譬曾棟之將傾。必華棖之先落。翳明離以上賓。屬傳體於纖萼。周二輝而分崩。擠九鼎於重壑。雖魚鳥之欲安。駭風川而迴羣。微天道之布新。嗟員首其焉託。予窮迹以多媿。塊離尤而獨處。君紆組於名邦。貽話言於洲渚。悵分手於東津。望徂舟而延佇。慮古今之爲隔。豈山川之云阻。賴先德之龍興。奉英靈之電舉。事紫泥之密勿。腰青緡而容與。沾後惠以竭來。竟卒獲其笑語。我艤舟以命徒。將汨徂於南夏。旣助予以炯戒。又引之以風雅。若笙簧之在聽。雖舒憂而可假。昔疢病於漳濱。思繼歌而莫寫。恩靈降之未已。奉京粉而作傅。臨邦途之永陌。懷余馬於騏驎。望平津而出宿。登崇岡而興賦。願飛轡之南迴。引行鑣而東驅。何瓌才之博侈。申贈辭於萱樹。指代匠而切偲。比治素而引喻。方含毫而報章。迫紛埃之東驚。釋末位以言歸。忽乘駟以南赴。連篇章之莫訓。欲寄言於往句。類鍛翻之難矯。似洞源之不注。意搔搔以杼柚。魂營營而馳鶖。爾腰戟於戎禁。我拂劍於郎圍。願同車以日夜。城望昏而掩扉。時遊盤以未極。瞻落景之徂輝。苦清顏之倏忽。吝歡賞之多違。排重關而休告。知南館之有依。騁職門以右轉。僕望路其如歸。忘清漏之不緩。惜曉露之方晞。聞夫君之東守。地隱蓄而懷僊。登金華以問道。得石室之名篇。悟寰中之迫脅。欲輕舉而舍旃。離寵辱於毀譽。去天伐於腥羶。忽攜手以上征。躋中皇之脩迴。巾帝車之廣軾。棹河舟之輕艇。歷星街之熠燿。浮天潢之溟溟。機九轉於玉漿。練七明於神鼎。吹萬化而不喧。度千春之可

並齊天地於倏忽。安事人間之紆綈哉。

思歸賦并序

夫鑿之積也無厚。而納窮神之照。心之徑也有域。而懷重淵之深。余少而薄遊。身□防方。思□俄然萬里。晚自□省。諒非一途。何則。此後闕

余菲薄以固陋。受恩靈而不訾。拖銀黃之沃若。剖金符之陸離。舟未濟而河廣。途方遙而馬疲。忽中寢而念厲。魂申旦而九移。昔受教於君子。逢知己之隆眄。被名立之羽儀。沾宦成之藻絢。羌服義而不怠。豈臨

岐而渝。宋作喻。依何改。變勢方迅於轉圓。理好旋於奔電。援弱葛而能升。踐重岡而不眩。信禋禮之非已。寧悔禍

其如見。大明廓以高臨。吹萬忻而同悅。跨神皋之沃衍。奉英藩之睿智。近刻作哲。案下有賴遐討於先哲。必不復用。疑智可讀哲。如逸周書

之賢亦通哲也。承比屋之隆化。踵芳塵之餘烈。懷齷齪之褊心。無夸毗之誕節。竟伊鬱而不怡。賴遐討於先哲。紛

吾生之遊蕩。彌一紀而歷茲。自下車於江海。涉青春於是時。瞻崇岡而引領。望大夏而長思。雖曲街之委

陋。猶寤寐而見之。況神交而通夢。眇河漢於佳期。爾乃眷言薄暮。南眺悠然。將整歸轡。願受一塵。考華城

之直陌。相洛浦之迴阡。連飛薨於故友。接閑館以懷僊。臨南場以藝菴。寄北池而采蓮。睇微莖之覆籬。望

水葉之田田。乃翦山木。不日爲功。非輪非奩。去斲去襲。夜索綯而繞繞。旦乘屋而芘芘。竹榭踣區而經北

繩。閉窈窕以臨東。布茵蕭於疎棹。織葦葑於迴櫺。于是籬插芳槿。門拂長楊。園桃春發。窗竹夏涼。晨露晞

而草覆。微風起而樹香。無芬菲以襲予。空旖旎於都房。恆離居以歲月。庸銷落而徒傷。我聞時命。有殖無遷。徵事或在。求理未甄。譬豐草之區別。隨霜露而天延。背萱鮮於堂北。尙幽幽而未捐。苟外物以能惑。亦在應而無驚。況朝霞之采可嚙。瓊屏之飾方宣。養以虛白之氣。悟以無生之篇。豈加璧之贈可動。執珪之位能纏。歸來薄暮。聊以永年。

七夕賦

奉護軍王命作

金祇司矩。火曜方流。素鍾登御。夷律鳴秋。朱光旣夕。涼雲始浮。盈多露之靄靄。升明月之悠悠。步廣階而延睇。屬天媛之淹留。嗟斯靈之淑景。招好仇於服箱。邁姮娥而擢質。凌瑤華而擅芳。厭白玉以爲飾。罪丹霞而爲裳。迴龍駕之容裔。亂鳳筦之淒鏘。騰燭光於西極。命二妃於瀟湘。軾帝車而捐袂。凌天津而上翔。悵漢渚之夕漲。忻河廣之旣梁。臨瑤席而宴語。綿含睇而蛾揚。嗟蘭夜之難永。泣會促而怨長。忌織阿之方駕。吝長庚之末光。撫鳴琴而修況。近刻浩安歌而自傷。歌曰。清絃愴兮桂觴酬。雲幄靜兮香風浮。龍鑿蹀兮玉鸞整。睇星河兮不可留。分雙袂之一斷。何四氣之可周。斯乃嚮像恍惚。彷彿幽墜。耳之無聞。目之無績。故鍾鼓聞而延子隱。白日沈而季后對。豈形器之所求。亦理將其如昧。君王壯思風飛。沖情雲上。願楚詩而縱轡。瞻蘭書而競爽。實研精之多暇。聊餘日之駘蕩。賦幽靈以去惑。排視聽而元往。晒陽雲於荆夢。賦洛篇於陳想。乃澄心而閑邪。庶綢繆於茲賞。

高松賦 本司徒竟陵王教作

閱品物於幽記。訪叢育於祕經。巡汜林之珍望。識斯松之最靈。提於巖以羣茂。臨於水而宗生。豈榆柳之比性。指冥椿而等齡。若夫修榦垂陰。喬柯飛穎。望肅肅而既閑。卽微微而方靜。懷風音而送聲。當月露而留影。旣芊眠於廣隰。亦迢遰於孤嶺。集九仙之羽儀。棲五鳳之光景。固松木之爲選。貫山川而自永。爾乃青春受謝。雲物含明。江皋綠草。曖然已平。紛弱葉而凝照。競新藻而抽英。陵翠山而如翦。施懸蘿而共輕。至於星迴窮紀。沙鴈相飛。同雲映其無色。陽光沈而減暉。卷風飈之吸歛。積霰雪之嚴霏。豈彫貞於歲暮。不受令於霜威。若乃體同器制。質兼上才。夏書稱其昏吠。周篇咏其徂徠。乃屈己以宏用。構大壯於雲臺。幸爲玩於君子。留神心而顧懷。君王乃徒讌蘭室。解珮明椒。攀幽蘭於夕陰。詠聳榦於琴朝。陵高邱以致思。御風景而逍遙。夷蔽冕之隆貴。懷汾陽之寂寥。邈道勝於千禩。蘊神理而自超。夫江海之爲大。實涓澮之所歸。瞻衡恆之峻極。不讓壤於塵微。嗟孤陋之無取。幸聞道於清徽。理弱羽於九萬。愧不能兮奮飛。

杜若賦 奉隨王教作時年二十六於坐獻

憑瑤圃而宜游。臨水木而延佇。柳含色於遠岸。泉鏡流於枉渚。蔭綠竹以淹留。藉幽蘭而容與。覽茲榮之悅茂。紛爲芳於清籟。觀夫結根擢色。發曜垂英。緣春巒以織布。蔭涼潭而影清。景奕奕以四照。枝靡靡而葉傾。冒霜蹊以獨舊。當春郊而逕平。攀汀洲以企予。懷石泉於幽情。嗟中巖之纖草。廁金芝於芳叢。夕舒

榮於潯露。且發彩於春風。承羲陽之光景。庶無悲於轉蓬。

野鷺賦并序

有門人斃一野鷺。因以爲獻。予時命以登俎。用待賓客。客有愛其羽毛。請予爲賦。其詞曰。
夫何羅人之伎巧。薦江海之逸禽。落摩天之迅羽。絕歸飛之好音。碎文錦之丹臆。裂雕綺之翠衿。孤雛鷺以靡翼。羈雌叫而莫尋。越滄流以遠致。乃交貿以兼金。因關寺以傳請。排蓬戶以重深。貴敷衽以取愛。願登俎以甘心。

遊後園賦 奉隨王
教作

積芳兮選木。幽蘭兮翠竹。上蕪蕪以蔭景。下田田兮被谷。左蕙晚兮彌望。右芝原兮寫目。山霞起而削成。水積明以經復。於是敞風闈之藹藹。聳雲館之苕苕。周步欄以升降。對玉堂之泱寥。追夏德之方暮。望秋清之始颺。藉宴私而遊衍。時晤語而逍遙。爾乃日棲榆柳。霞照夕陽。孤蟬以散去。鳥成行。惠氣湛兮帷殿。肅清陰起兮池館涼。陳象設兮以玉璫。粉蘭藉兮咀桂漿。仰微塵兮美無度。奉英軌兮式如璋。藉高文兮清談。預含毫兮握芳。則觀海兮爲富。乃游聖兮知方。

臨楚江賦

爰自山南。薄暮江潭。滔滔積水。裊裊霜嵐。憂與憂兮竟無際。客之行兮歲已嚴。爾乃雲沈四岫。風蕩中川。

馳波鬱素。駭浪浮天。明沙宿莽。石路相懸。於是霧隱行鴈。霜眇虛林。迢迢落景。萬里生陰。列檣笳兮極浦。弭蘭鷁兮江潯。奉玉樽之未暮。滄口勝之芳音。願希光兮秋月。庶永照於遺簪。

擬宋玉風賦奉司徒
教作

起日域而搖落。集桂宮而送清。開翠帳之影藹。響行珮之輕鳴。揚淮南之妙舞。發齊后之妍聲。下鴻池而蓮散。上爵臺而雲生。至於新虹明歲。高月照秋。睟儀迺豫。冲想雲浮。鄒馬之賓咸至。申穆之禮已酬。朝役登樓之詠。夕引小山之謳。厭朱邱之沈邃。思輕舉而遠游。騶騶之馬魚躍。飄鑿車而水流。此乃宋玉近刻
作大王之盛風也。若夫子雲寂寞。叔夜高張。煙霞潤色。荃蕙結芳。出礪幽而泉冽。入山戶而松涼。眇神王於邱壑。獨超遠於孤觴。斯則幽人之風也。

樂歌

雩祭歌建武二年
明堂辭

清明暢。禮樂新。候龍景。選貞辰。
陽律亢。陰晷伏。耕下土。荐種稔。
宸儀警。王度宣。瞻雲漢。望旻天。
張盛樂。奏雲儼。集五精。延帝祖。

粵有諷。禁有秩。秬鬯芬。圭瓚苾。
靈之來。帝闈開。車煜燿。吹徘徊。
停龍轡。徧觀此。涑雨飛。祥雲靡。
壇可臨。奠可敬。對毗社。鑒皇心。

右迎神歌八章。章四句。句三言。

濬哲維祖。長發其武。帝出自震。重光御寓。七德攸宣。九疇咸敍。靜難荆衡。凝威蠡浦。
昧且不承。夕惕刑政。化一車書。德馨粢盛。昭星夜景。非雲曉慶。衢室成陰。璧水如鏡。
禮充玉帛。樂被匏絃。於鑠在詠。陟配于天。自宮徂兆。靡愛牲怪。我將我享。永祚豐年。

右世祖武皇帝歌三章。章八句。句四言。

營翼日。鳥殷宵。凝冰泮。元蟄昭。
景陽陽。風習習。女夷歌。東皇集。
奠春酒。秉青珪。命田祖。渥羣黎。

右青帝歌三章。章四句。句三言。

惟此夏德。德恢台。兩龍在御。炎精來。

火景方中南譎秩。靡草云黃含桃實。
族雲鬱鬱溫風煽。興雨祁祁黍苗遍。

右赤帝歌三章章二句句七言。

稟火自高明。毓金挺剛克。涼燠資成化。羣方載厚德。
陽季句萌達。炎徂溽暑融。商暮百工止。歲極凌陰沖。
泉流疏已清。原隰遠而一作平。咸言祚惟億。敦民保高京。

右黃帝歌三章章四句句五言。

帝說于兌執矩固司藏。百川收潦精景應金方。
嘉樹離披榆關命賓鳥。夜月如霜金風方嫋嫋。
商陰肅殺萬寶咸亦逾。勞哉望歲場功冀可收。

右白帝歌三章章二句句九言。

白日短元夜深。招搖轉移太陰。霜鐘鳴冥陵起。星迴天月窮紀。
聽嚴風來不息。望元雲黝無色。曾冰裂積羽幽。飛雪至天山側。
關梁閉方不巡。合國吹饗蜡賓。統微陽究終始。百禮洽萬祚臻。

右黑帝歌三章章四句句六言

敬如在。禮將周。神之駕。不少留。
躍龍鑣。轉金蓋。紛上馳。雲之外。
警七曜。詔八神。排閭闔。渡天津。
有滄輿。盾寸積。雨冥冥。又終夕。
俾棲糧。維萬箱。皇情暢。景命昌。

右送神歌五章章四句句三言

四言詩

侍宴華光殿曲水奉敕為皇太子作

旁求邃古。泚聽鴻名。大寶曰位。得一為貞。朱綈叶社。綠字摛英。升配同貫。進讓殊聲。
大橫將屬。會昌已命。國步中阻。宸居膺慶。璽劍先傳。龜玉增映。宗堯有緒。復禹無競。
禮行郊社。人神受職。寶效山川。鱗羽變色。元塞北靡。丹微南極。浮翥駕風。飛一作非泳登一作非陟。
能官民秀。利建天跗。枵鶉列野。營降分區。論思帝則。獻納宸樞。麟趾方公一作定。鶴翼誰濡。
西京藹藹。東都濟濟。秋祓濯流。春禊浮醴。初吉云獻。上除方啓。昔駕陽頻。穎一作今帳雲陸。

嘉樂舊矣。芳宴在斯。裁留神賜。有睟天儀。龍精已映。威仰未移。葉依黃鳥。花落春池。高殿宏敞。禁林稠密。青燈颯起。丹樓閒出。翠葆隨風。金戈動日。惆悵清管。徘徊輕佻。霸滙入筵。河淇流阡。海若一作娒谷來往。觴肴浚泝。歡飫終日。一作有終。清光欲暮。輕貂一作約。回道一作首。華組徐步。登賢博望。賦一作賦清漳。漢貳稱敏。魏兩垂芳。監撫有則。七鬯無方。瞻言守器。永媿元良。

三日侍華光殿曲水宴代人應詔

羣分未辯。類聚茲式。天睟休明。且求至德。御繁實簡。制動惟默。官府百王。衣裳萬國。中葉遭閔。副內多違。悠悠靈貺。爰有適歸。於昭睿后。撫運天飛。疑居中縣。神動外畿。縣象著明。離光乃位。我有儲德。徽猷淵備。長壽察書。龍樓迴轡。重道上庠。行遵儒肆。朝陽有幹。布葉萋萋。思皇威矣。鷄羽高棲。出馳先輅。入秉介珪。瞻秦望井。建魯分奎。求賢每勞。得士方逸。有覺斯順。無文成秩。萬箱惟重。百鍤載郵。屈草戒諛。階冀紀日。文教已肅。武節旣馳。榮光可照。合璧如規。載懷姑射。尙想瑤池。濯龍乃飾。天淵在斯。作樂願動。實符時義。上春初吉。亦留淵寄。紅樹巖舒。青莎一作蘊。水被雕梁。虹拖雲甍。鳥跂高縣。甲帳周褰。繡帷長筵。列陸激水。旋墀浮醪。聚蟻靈蔡。呈姿河宗。躍踢海介。夔昵弱腕。纖腰遷延。妙舞秦箏。趙瑟殷勤。促柱降席。連綏稱觴。接武稽首。萬年獻茲多祜。

天地既成。泉流既清。薄暮沾幸。屬奉文明。將標齊配。刻掃秦京。願馳龍漠。飲馬縣旌。

三日侍宴曲水代人應詔

神理內寂。機象外融。遺情汾水。垂冕鴻宮。樹以司牧。匪我求蒙。徒勤日用。誰契元功。
往晦必明。來碩資蹇。於皇克聖。時乘御辯。寶歷載暉。瑤光重踐。昭昭舊物。熙熙遷善。
當宁日昊。求衣未明。抵璧焚翠。銷劍墮城。九疇式序。三辟再清。虞箴罔闕。矇奏傳聲。
麗景則春。儀方在震。重聖積厚。金式瓊潤。天尊必諧。王臣咸盡。譬諸華霍。惟邦之鎮。
正朔蔥瀚。冠冕邛越。爭長明堂。相趨魏闕。龜象南薦。環裘西發。巢閣易窺。馴庭難穢。
上巳惟昔。于彼禊流。祓穢河滸。張樂春疇。既停龍駕。亦泛鳧舟。靈宮備矣。無待茲遊。
初翳命曉。朝霞一作華開夜。飾陸導源。迴伊流瀨。極望天淵。曲阻謬榭。閑館巖敞。長廊水架。
金觴搖蕩。玉俎推移。筵浮水豹。席援雲螭。寥亮琴瑟。嗷眺埴簾。歡茲廣讌。穆是天儀。
周道如砥。康衢載直。徒媿元黃。負恩無力。華輶徒駕。長纓未飾。相彼失晨。寧忘鼓翼。

謝宣城詩集卷第二

鼓吹曲

元會曲

二儀啓昌歷。三陽應慶期。珪贄紛成序。鯁譯憬來思。分階絕組練。充庭羅翠旗。觴流白日下。吹溢景雲滋。天儀穆藻殿。萬宇壽皇基。

郊祀曲

六宗禋配嶽。五時奠甘泉。整蹕遊九闕。清籥開八埏。鎗鎗玉鑾動。溶溶金障宋作障。旋均宮光已屬。注音升柴禮既虔。福響雲之集。南嶽固斯年。

鈞天曲

高晏顯天臺。置酒迎風觀。笙鏞禮百神。鍾石動雲漢。瑤池寶瑟驚。綺席舞衣散。紫鳳來參差。玄鶴至凌亂。已慶明庭樂。誰想南風彈。

右三曲頌帝功

入朝曲

江南佳麗地。金陵帝王州。逶迤帶淶水。迢遞起朱樓。飛臺夾馳道。垂楊蔭御溝。凝笳翼高蓋。疊鼓送華輜。獻納雲臺表。功名良可收。

出藩曲

雲枝紫微內。分組承明阿。飛舡遡極浦。旌節去關河。眇眇蒼山色。沈沈寒水波。饒音巴渝曲。簫鼓盛唐歌。夫君邁惟德。江漢仰清和。

校獵曲

凝霜冬十月。殺盛涼飈開。原澤曠千里。騰騎紛往來。平置望煙合。烈火從風迴。殪獸華容浦。張樂荆山臺。虞人昔有喻。明哲時戒哉。

右三曲頌藩德

從戎曲

選旅辭輜轅。引節趨河源。日起霜戈照。風迴連騎翻。紅塵朝夜合。黃沙萬里昏。嘹唳清笳轉。蕭條邊馬煩。自勉輟耕願。征役去何言。

送遠曲

北梁辭歡宴。南浦送佳人。方衢控龍馬。平路騁朱輪。璠筵妙舞絕。桂席羽觴陳。白雲邱陵遠。山川時未因。

一爲清吹激，潺湲傷別巾。

登山曲

天明開秀粵，瀾光媚碧堤。風盪翻鸞亂，雲行芳樹低。暮春春服美，遊駕凌丹梯。升嶠旣小魯，登巒且悵齊。王孫尙遊衍，蕙艸芳萋萋。

泛水曲

玉露沾翠葉，金風鳴素枝。罷遊平樂苑，泛鷁昆明池。旌旗散容裔，簫管鼓宋作吹參差。日晚厭遵渚，採菱贈清漪。百年如流水，寸心寧共知。

右四曲闕三字

同沈右率諸公賦鼓吹曲名，先成爲次。

芳樹

發萼九華嶼，開跗露寒側。氛氲非一香，參差多異色。宿昔寒飈舉，摧殘不可識。霜雪交橫至，對之長歎息。

沈右率約

當對酒

對酒心自足，故人來共持。方悅羅衿解，誰念髮成絲。徇性良爲達，求名本自欺。迨君當歌日，及我傾罇時。

范通直雙

臨高臺

眺時爲隨王文學

千里常思歸。登臺瞻綺翼。纔見孤鳥還。未辨連山極。四面動清風。朝夜起寒色。誰識一作倦遊者。嗟此故鄉憶。

巫山高

王尹丞啟

仿像巫山高。薄暮陽臺曲。煙雲宋作乍舒卷。猿鳥宋作時斷續。彼美如可期。寤言紛在矚。憮然坐相望。秋風下庭綠。

有所思

劉中書檢

別離安可再。而我更重之。佳人不相見。明月空在帷。共銜滿堂酌。獨斂向隅眉。中心亂如雲。寧知有所思。

同前再賦

芳樹

融

早翫華池陰。復鼓滄洲柅。椅梔芳若斯。葳蕤紛可結。霜下桂枝銷。怨與飛蓬折。不廁玉盤滋。誰憐終萎絕。
宋本鼓作影。結作繼。折作遊。絕作細。

同前

融

相望早春日。煙花雜如霧。復此佳麗人。含姿結芳樹。綺羅已自情。近刻萱風多有趣。去來徘徊者。佳人不
可遇。

臨高臺

約

高臺不可望。望遠使人愁。連山無斷絕。河水復悠悠。所思躑何在。洛陽南陌頭。可望不可至。何用解人憂。

有所思

融

如何有所思。而無相見時。夙昔夢顏色。階庭尋履綦。高歌更何已。引滿終自期。一作持欲知憂能老。為視鏡

中絲。

巫山高

繪

高唐與巫山。參差鬱相望。灼爍在雲閒。氛氲出霞上。散雨收夕臺。行雲卷晨帳。出沒不易期。嬋娟似惆悵。

同前

雲

巫山高不極。白日隱光輝。遙遙朝雲出。冥冥暮雨歸。巖縣獸無宋本二字倒迹。林暗鳥疑飛。枕席竟誰薦。相嶺

空依依。

同賦雜曲名

陽春曲

檀秀才

青雲獻初歲。白日映雕梁。蘭萌猶自短。柳葉未能長。已見花紅落。復聞花蕊香。樂此試遊衍。誰知心獨傷。

淶水曲

江朝請

塘上蒲欲齊。汀洲杜將歇。春心既易蕩。春流豈難越。桂棹及晚風。菱影映初月。芳香若可贈。爲君步羅襪。

採菱曲

陶功曹

朝日映蘭澤。乘風入桂嶼。棹歌已流倡。輕舟復容與。勿違佳期移。方追明月侶。採採詎盈網。還望空延佇。

秋竹曲

眺時爲宣城守

嫵娟綺窗北。結根未參差。從風旣曷曷。映日頗離離。欲求棗下吹。別有江南枝。但能凌白雪。真心蔭曲池。

白雪曲

朱孝廉

凝雲沒霄漢。從風飛且散。連翩下幽谷。徘徊依井幹。旣興楚客謠。亦動周王歎。所恨輕寒質。不迨春歸旦。

永明樂

第一

帝圖潤九有。皇風浮四溟。永明一爲樂。咸池無復靈。

第二

民和禮樂富。世清歌頌徽。鴻名軼卷領。稱首邁垂衣。

第三

朱臺鬱相望。青槐紛馳道。秋雲湛甘露。春風散芝草。

第四

龍樓日月照。淄館風雲清。儲光溫似玉。藩度式如瓊。

第五

化洽饒海君。恩變龍庭長。西北驚環裘。東南盡龜象。

第六

出車長洲苑。選旅朝夕川。絡絡結雲騎。奕奕泛戈船。

第七

燕駟遊京洛。趙服麗有暉。清歌留上客。妙舞送將歸。

第八

實相薄五禮。妙化開六塵。明祥已玉燭。寶瑞亦金輪。

第九

生蔑芊羅性。身與佳惠隆。飛纓入華殿。屣步出重宮。

第十

彩鳳鳴朝陽。元鶴舞清商。瑞此永明曲。千載今爲皇。

玉階怨

夕殿下珠簾。流螢飛復息。長夜縫羅衣。思君此何極。

金谷聚

渠。椀。送。佳。人。玉。梧。要。上。客。車。馬。一。東。西。別。後。思。今。夕。

王孫遊

綠草蔓如絲。雜樹紅英發。無論君不歸。君歸芳已歇。

銅爵悲

落日高城上。餘光入繡帷。寂寂深松晚。寧知琴瑟悲。

江上曲

易陽春草出。踟躕日已暮。蓮葉向田田。淇水不可渡。願子淹桂舟。時同千里路。千里既相許。桂舟復容與。

江上可採菱。清歌共南楚。

曲池之水

緩步遵莓渚。披襟待薰風。芙蓉舞輕葍。包筍出芳叢。浮雲自西北。江海思無窮。鳥去能傳響。見我綠琴中。

綠琴一作測琴。

同謝諮議詠銅爵臺

繡帷飄井幹，罇酒若平生。
鬱鬱西陵樹，詎聞歌吹聲。
芳襟染淚迹，嬋娟空復情。
玉座猶寂寞，況乃妾身輕。

謝宣城詩集卷第三

將發石頭上烽火樓

徘徊戀京邑。躑躅躡會阿。陵高墀闕近。眺迴風雲多。荆吳阻山岫。江海含瀾波。歸飛無羽翼。其如離別何。

答王世子

飛雪天山來。飄聚繩樞外。蒼雲暗九重。北風吹萬籟。有酒招親朋。思與清顏會。熊席惟爾安。羔裘豈吾帶。公子不垂堂。誰寫憐蕭艾。

答張齊興

荆山菟百里。漢廣流無極。北馳星晷正。南望朝雲色。川隰同幽快。冠冕異今昔。子肅兩岐功。我滯三冬職。誰知京洛念。髣髴昆山側。向夕登城壕。潛池隱復直。地迴聞遙蟬。天長望歸翼。清文忽景麗。思泉紛寶飾。勿言修路阻。勉子康衢力。會匪寂且寥。歸軫逝言陟。

酬王晉安

梢梢枝早勁。塗塗露晚晞。南中榮橘柚。寧知鴻鴈飛。拂霧朝青閣。日盱坐彤闈。悵望一途阻。參差百慮依。春草秋更綠。公子未西歸。誰能久京洛。淄塵染素衣。

暫使下都夜發新林至京邑贈西府同僚

大江流日夜。客心悲未央。徒念關山近。終知返路長。秋河曙耿耿。寒渚夜蒼蒼。引領見京室。宮雉正相望。金波麗鵷鵲。玉繩低建章。驅車鼎門外。思見昭邱陽。馳暉不可接。何況隔兩鄉。風煙近刻有鳥路。江漢限無梁。常恐鷹隼擊。時菊委嚴霜。寄言爵羅者。寥廓已高翔。

始出尚書省

惟昔逢休明。十載朝雲陛。既通金閨籍。復酌瓊筵醴。宸景厭昭臨。昏風淪繼體。紛虹亂朝日。濁河穢清濟。防口猶寬政。餐荼更如薺。英袞暢人謀。文明固天啓。青精翼紫軟。黃旗映朱邸。還覩司隸章。復見東都禮。中區咸已泰。輕生諒昭酒。趨事辭宮闕。載筆陪旌棨。邑里向疎蕪。寒流自清泚。衰柳尙沈沈。凝露方泥泥。零落悲友朋。歡娛燕兄弟。既秉丹石心。寧流素絲涕。因此得蕭散。垂竿深淵底。

直中書省

紫殿肅陰陰。彤庭赫宏敞。風動萬年枝。日華承露掌。玲瓏結綺錢。深沈映朱網。紅藥當堦翻。蒼苔依砌上。茲言翔鳳池。鳴佩多清響。信美非吾室。中園思偃仰。朋情以鬱陶。春物方駘蕩。安得凌風翰。聊恣山泉賞。

觀朝雨

朔風吹飛雨。蕭條江上來。既灑百常觀。復集九成臺。空濛如薄霧。散漫似輕埃。平明振衣坐。重門猶未開。

耳目暫無擾。懷古信悠哉。戢翼希驥首。乘流畏曝鰓。動息無兼遂。岐路多徘徊。方同戰勝者。去翦北山萊。
新亭渚別范零陵雲

洞庭張樂地。瀟湘帝子遊。雲去蒼梧野。水還江漢流。停驂我悵望。輟棹子夷猶。廣平聽方籍。茂陵將見求。心事俱已矣。江上徒離憂。

之宣城郡出新林浦向板橋

江路西南永。歸流東北鶩。天際識歸舟。雲中辨江樹。旅思倦搖搖。孤遊昔已屢。既歡懷祿情。復協滄洲趣。驪塵自茲隔。賞心於此遇。雖無元豹姿。終隱南山霧。

始之宣城郡

下帷闕章句。高談媿名理。疎散謝公卿。蕭條依掾史。簪髮逢嘉惠。教義承君子。心迹苦未并。憂歡將十祀。幸沾雲雨慶。方轡參多士。振鷺徒追飛。羣龍難隸齒。烹鮮止貪競。共治屬廉恥。伊余昧損益。何用祇千里。解劍北宮朝。息駕南川涘。寧希廣平詠。聊慕華陰市。棄置宛洛遊。多謝金門裏。招招漾輕幟。行行趨巖趾。江海雖未從。山林於此始。

宣城郡內登望

借問下車日。匪直望舒圓。寒城一以眺。平楚正蒼然。山積陵陽阻。溪流春穀泉。威紆詎遙甸。嶠岳帶遠天。

切切陰風暮。桑柘起寒煙。悵望心已極。恹恹魂屢遷。結髮倦爲旅。平生早事邊。誰規鼎食盛。寧要狐白鮮。方棄汝南諾。言稅遼東田。

冬日晚郡事隙

案牘時閒暇。偶坐觀卉木。颯颯滿池荷。脩脩蔭窗竹。簷隙自周流。房櫺閑且肅。蒼翠望寒山。崢嶸瞰平陸。已悵慕歸心。復傷千里目。風霜旦夕甚。蕙草無芬馥。云誰美笙簧。孰是厭遊軸。願言追逸駕。臨潭餌秋菊。

後齋迴望

高軒瞰四野。臨牖眺襟帶。望山白雲裏。望水平原外。夏木轉成帷。秋荷漸如蓋。鞏洛常瞻然。搖心似縣旆。落日悵望

昧旦多紛喧。日宴未遑舍。落日餘清陰。高枕東窗下。寒槐漸如束。秋菊行當把。借問此何時。涼風懷朔馬。已傷慕歸客。復思離居者。情嗜幸非多。案牘偏爲寡。旣乏郎邪政。方憩洛陽社。

望三湖

積水照頽霞。高臺望歸翼。平原周遠近。連汀見紆直。葳蕤向春秀。芸黃共秋色。薄暮傷哉人。嬋媛復何極。

遊山

託養因支離。乘閑遂疲蹇。語默良未尋。得喪云誰辨。幸洩山水都。復值清冬緬。凌崖必千仞。尋谿將萬轉。

堅嶠既峻嶒。迴流復宛澶。杳杳雲竇深。淵淵石溜淺。傍眺鬱纂筍。還望森柗榦。荒隩被葳莎。崩壁帶苔蘚。鼯狖叫層巖。鷗鳧戲沙衍。觸賞聊自觀。卽趣咸已展。經目惜所遇。前路欣方踐。無言蕙草歇。留垣芳可蹇。尙子時未歸。邴生思自免。求志昔所欽。勝迹今能選。寄言賞心客。得性良爲善。

賽敬亭山廟喜雨

夕帳懷椒糈。獨景潔管籥。登秋雖未獻。望歲佇年祥。潭淵深可厲。狹斜車未方。蒙籠度絕限。出沒見林堂。秉玉朝羣帝。樽桂迎東皇。排雲接虬蓋。蔽日下霓裳。會舞紛瑤席。安歌遶鳳梁。百味芬綺帳。四座沾烈觴。福被延氓澤。樂極思故鄉。登山騁歸望。原雨晦茫茫。胡寧味千里。解珮拂山莊。

祀敬亭山廟

翦削兼太華。嶸嶸跨元圃。貝闕_{何疑}阿河。宮。薛帷陰網戶。參差時未來。徘徊望澧浦。椒醕若馨香。無絕傳終古。

遊敬亭山

茲山互百里。合沓與雲齊。隱淪旣已託。靈異居然棲。上干蔽白日。下屬帶迴谿。交藤荒且蔓。樛枝聳復低。獨鶴方朝唳。飢鼯此夜啼。泄雲已漫漫。夕雨亦淒淒。我行雖紆組。兼得尋幽蹊。綠源殊未極。歸徑宵如迷。要欲追奇趣。卽此陵丹梯。皇恩竟已矣。茲理庶無睽。

賦貧民田

假遇一作佳非將迎。靖共一作靜拱延殊慶。中歲歷三臺。旬月典邦政。一作會是共治清。敢忘卹貧病。將無富教禮。何云當作理孰有知方性。敦本抑工商。均業省兼并。察壤見泉脈。胡星視農正。黍稷緣高殖。一作稷稌卽卑盛。舊埒新塍分。青苗白水映。遙樹匝清陰。連山周遠淨。卽此風雲佳。孤觴聊可命。既微三載道。庶藉兩岐詠。俾爾倉廩實。余從谷口鄭。

與江水曹至濱干戲

山中上芳月。故人清樽賞。遠山翠百重。迴流映千丈。花枝聚如雪。蕪絲散猶網。別後能相思。何嗟異封壤。

送江水曹還遠館

高館臨荒途。清川帶長陌。上有流思人。懷舊望歸客。塘邊草雜紅。樹際花猶白。日暮有重城。何由盡離席。

送江兵曹檀主簿朱孝廉還上國

方舟泛春渚。攜手趨上京。安知慕歸客。詎億近刻作憶山中情。香風蕊上發。好鳥葉閒鳴。揮袂送君已。獨此夜琴聲。

臨溪送別

悵望南浦時。徙倚北梁步。葉下涼風初。日隱輕霞暮。荒城迴易陰。秋溪廣難渡。沫泣豈徒然。君子行多露。

將遊湘水尋句溪

既從陵陽釣。挂鱗騁赤螭。方尋桂水原。謁帝蒼山垂。辰哉且未會。乘景弄清漪。瑟汨瀉長淀。潺湲赴兩歧。輕蘋上靡靡。雜石下離離。寒草分花映。戲鮪乘空移。興以暮秋月。清霜落素枝。魚鳥余方翫。纓綵君自靡。及茲暢懷抱。山川長若斯。

忝役湘州與宣城吏民別

弱齡倦簪履。薄晚忝華輿。閑沃盡地區。山泉諧所好。幸遇昌化穆。惇淳一作俗罕驚暴。四時從偃息。三省無侵冒。下車遽暄席。紆紱始黔竈。榮辱未遑敷。德禮何由導。汨徂奉南岳。兼秩典邦號。疲馬方云驅。鉛刀安可操。遺惠良寂寞。恩靈亦匪報。桂水日悠悠。結言幸相勞。吐納貽爾和。窮通勛所蹈。

休沐重還丹陽道中

薄遊第從告。思閑願罷歸。還邛歌賦似。休汝車騎非。灞池不可別。伊川難重違。汀葭稍靡靡。江蓼復依依。田鴿遠相叫。沙鶉忽爭飛。雲端楚山見。林表吳岫微。試與征徒望。鄉淚盡沾衣。賴此盈樽酌。含景望芳菲。問我勞何事。寤沐仰清徽。志狹輕軒冕。恩甚戀闈闈。歲華春有酒。初服偃郊扉。

移病還園示親屬

疲策倦人世。斂性就幽蓬。停琴佇涼月。滅燭聽歸鴻。涼兼近刻乘暮晰。秋華臨夜空。葉低知露密。崖斷識

雲重折荷蕢寒袂。開鏡晒衰容。海暮疑騰清氣。河關祕棲沖。煙衡時未歇。芝澗去相從。

出下館

麥候始清和。涼雨銷炎燠。紅蓮搖弱荇。丹藤繞新竹。物色盈懷抱。方駕娛耳目。零落既難留。何用存華屋。

遊東田

戚戚苦無惊。攜手共行樂。尋雲陟累榭。隨山望菌閣。遠樹曖阡阡。生煙紛漠漠。魚戲新荷動。鳥散餘花落。不對芳春酒。還望青山郭。

秋夜講解

四緣去誰肇。七識習未央。沈沈一作淵淵倒營魄。苦蔭蹙愁腸。琴瑟徒爛漫。姱容空滿堂。春顏遽幾日。秋壘終茫茫。孰云濟沈溺。假願託津梁。惠唱摘泉湧。妙演發金相。空有定無執。賓賓固兩忘。自來乘首夏。及此申暮霜。雲物清晨景。衣巾引夕涼。風振蕉蓮裂。霜下梧楸傷。一作露下 梧桐傷六龍且無借。三相寧久長。何時接靈應。及子同舟航。

秋夜

秋夜促織鳴。南鄰搗衣急。思君隔九重。夜夜空佇立。北窗輕幔垂。西戶月光入。何知白露下。坐視階前溼。誰能長分居。秋盡冬復及。

春思

茹溪發春水。阡山起朝日。蘭色望已同。萍際轉如一。巢燕聲上下。黃鳥弄儻匹。邊郊阻遊衍。故人盈契闊。夢寐藉假簣。思歸賴倚瑟。幽念漸鬱陶。山楹永爲室。

治宅

結宇夕陰街。荒途橫九曲。迢遞南川陽。迤邐西山足。闕館臨秋風。敞窗望寒旭。風碎池中荷。霜翳江南菽。旣無東都金。且稅東皋粟。

冬緒羈懷示蕭諮議虞田曹劉江二常侍

去國懷邱園。入遠滯城闕。寒燈耿宵夢。清鏡悲曉髮。風草不留霜。冰池共如月。寂寞此閑帷。琴樽任所對。客念坐嬋媛。年華稍菴蕪。夙慕雲澤遊。共奉荆臺績。一作一聽春鶯喧。再視秋虹近刻作鴻沒。疲驂良易返。恩一作思。波不可越。誰慕臨淄鼎。常希茂陵渴。依隱幸自從。求心果蕪昧。方軫歸歟願。故山芝未歇。

懷故人

芳洲有杜若。可以慰佳期。望望或超遠。何由見所思。我行未千里。山川已閒之。離居方歲月。故人不在茲。清風動簾夜。孤月照窗時。安得同攜手。酌酒賦新詩。

夜聽伎二首

瓊闈鉤響聞。瑤席芳塵滿。要取洛陽人。共命江南管。情多舞態遲。意傾歌弄緩。知君密見親。寸心傳玉盃。上客光四座。佳麗直千金。挂斂報纓絕。墮珥答琴心。蛾眉已共笑。清香復入衿。歡樂夜方靜。翠帳垂沈沈。

京路夜發

擾擾整夜裝。肅肅戒徂兩。曉星正寥落。晨光復泱泱。猶沾餘露團。稍見朝霞上。故鄉邈已負。山川修且廣。文奏方盈前。懷人去心賞。敕躬每踟躕。瞻恩惟震蕩。行矣倦路長。無由稅歸鞅。

晚登三山還望京邑

霸溪望長安。河陽視京縣。白日麗飛蕙。參差皆可見。餘霞散成綺。澄江靜如練。嘯鳥覆春洲。雜英滿芳甸。去矣方滯淫。懷哉罷歡宴。佳期悵何許。淚下如流霰。有情知望鄉。誰能鬢不變。

高齋視事

餘雪映青山。寒霧開白日。曖曖江村見。離離海樹出。披衣就清盥。憑軒方秉筆。列俎歸單味。連駕止容膝。空爲大國憂。紛詭諒非一。安得掃蓬逕。銷吾愁與疾。

郡內高齋閑望答呂法曹

呂僧珍爲
齊王法曹

結構何迢遞。曠望極高深。窗中列遠岫。庭際俯喬林。日出衆鳥散。山暝孤猿吟。已有池上酌。復此風中琴。非君美無度。孰爲勞寸心。惠而能好我。問以瑤華音。若遺金門步。見就此一作山岑。

謝宣城詩集卷第四

直石頭

蕭衍

率土皆王土。安知全高尙。東壘弃黍稷。西遊入卿相。屬逢利建始。投分參未將。尺一功未施。河山賞已諒。攝官因時暇。曳裾聊起望。鬱盤地勢遠。參差百雉壯。翠壁絳霄際。丹樓青霞上。夕池出濠渚。朝雲生疊嶂。籠鳥易爲恩。屠羊無飾讓。秦階端且平。海水本無浪。小臣何日歸。頓轡從閑放。

和蕭中庶直石頭

九河互積岨。三隄鬱旁眺。皇州摠地德。回江款巖微。井幹艷蒼林。雲叢蔽層嶠。川籠旦上薄。山光晚餘照。翔集亂歸飛。虹蜺紛引曜。君子奉神略。瞰迴馮重峭。彈冠已籍甚。升車益英妙。功存漢冊書。榮竝周庭燎。汲疾移偃息。董園倚談笑。塵旆一悠悠。謙姿光且劭。讌嘉多暇日。興文起淵調。曰余廁鱗羽。滅影從漁釣。澤渥資投分。逢迎典待詔。詠沼邈含毫。專城空坐嘯。徒慚皇鑒揆。終延曲士誚。方追隱淪訣。偶解金丹要。若偶巫咸招。帝閭良可叫。

經劉瓛墓下

隨郡王蕭子隆

升堂子不謬。問道余未窮。如何辭白日。千載隔音通。山門一已絕。長夜緬難終。初松切暮鳥。新楊摧曉風。

榛關向蕪密，泉途轉銷空。

登山望雷居士精舍，同沈右衛過劉先生墓下作并序

竟陵王蕭子良

沛國劉子珪，學優來仕，跡邇心遐，履信體仁，古之遺德。潛舟迅景，滅賞淪輝，言念芳猷，式懷嗟述。屬舍弟隨郡，有示來篇，彌緝久要之情，益深宿草之歎。升望西山，率爾為答。雖因事雷生，實申悲劉子云爾。
漢陵淹館蕪，晉彌洙風闕。五都聲論空，三河文義絕。興禮邁前英，談元踰往昔。明情日夜深，徽音歲時滅。垣井總已平，煙雲從容裔。爾歎牛山悲，我悼驚川逝。

奉和

虞炎

下帷聞昔儒，窺園信且逸。聚學叢煙郊，栖遁宋作道事環筆。戢景謝歸年，稅駕空悠日。庭露已沾衣，松門向蕭瑟。悵悵神念周，依依惠言密。

奉和

柳惲

西河寂高業，北海望清塵。曾徵誰與寄，尙德在伊人。遺文重昭晰，絕緒復紛綸。露華白朝日，蘭生無久春。芳猷動淵思，撫軾履高辰。山風起寒木，野雀亂秋榛。壘草時易宿，素軌邈難遵。

奉和

沈約

表閭欽逸軌，軾墓禮貞魂。化途終眇默，神理曖猶存。塵經未輟幌，高衡已委門。日蕪子雲舍，徒望董生園。

華陰無遺市。楚席有靈當作樽。元泉倘能慰。長夜且勿論。

奉和竟陵王同沈右率過劉先生墓

嘉樹因枝條。瓌玉良可寶。若人陵曲臺。垂帷茂淵道。善誘宗學原。鳴鍾霽幽抱。仁焉徂宛洛。清徽夜何早。歲晚結松陰。平原亂秋草。不有至言揚。終滯西山老。

離夜

玉繩隱高樹。斜漢耿層臺。離堂華燭盡。別幌清琴哀。翻潮尙知限。客思眇難裁。山川不可夢。況及一作故人杯。

同前

江丞

石泉行可照。蘭杜向寒風。離歌上春日。芳思徒以空。情遽曉雲發。心在夕河終。幽琴一罷調。清酌誰復同。

同前

王常侍

月沒高樓曉。雲起扶桑時。燭筵暖無色。行住憫相悲。當軒已凝念。況乃清江湄。懷人忽千里。誰緩鬢徂絲。

餞謝文學

沈右率

漢池水如帶。巫山雲似蓋。瀟汨背吳潮。潺湲橫楚瀨。一望沮漳水。寧思江海會。以我徑寸心。從君千里外。

同前

虞別駕

差池燕始飛。羃歷草初輝。離人悵東顧。遊子去西歸。清潮已駕渚。溽露復沾衣。一乖當春聚。方掩故園扉。

同前

范通直

陽臺霧初解。夢渚冰裁綠。遠山隱不見。平沙斷還續。分弦饒苦音。別唱多悽曲。爾拂後車塵。我事東臯粟。

同前

王中書

所知共歌笑。誰忍別笑歌。離軒思黃鳥。分渚夢清莎。翻情結遠旆。灑淚與煙波。春江夜明月。還望情如何。

同前

蕭記室

執手無還顧。別渚有西東。荆吳渺何際。煙波千里通。春篔方解籜。弱柳向一作向低風。相思將安寄。悵望南飛鴻。

同前

劉中書

汀洲千里芳。朝雲萬重色。悠然在天隅。之子去安極。春潭無與窺。秋臺共誰陟。不見一佳人。徒望西飛翼。

和別沈右率諸君

春夜別清樽。江潭復爲客。嘆息東流水。如何故鄉陌。重樹日芬蘆。芳洲轉如積。望望荆臺下。歸夢一作相思夕。

臥疾敘意

王秀之

貞悔不少期。福極固難豫。疾藥雖一途。遂以千百慮。景仄念徂齡。帶緩每危曙。循躬雖一作既已茲。況復歲將暮。層冰日夜多。飛雲密如霧。歸鴻互斷絕。宿鳥莫能去。輟我邱中瑟。良田一嗟故。隱淪迹有違。宰官功未樹。何用攬余情。恨恨此故路。豈言勞者歌。且曰幽人賦。

和王長史臥病

岷岫款崇崖。派別朝洪河。兔園文雅盛。章臺冠蓋多。淵襟眷睿岳。變贊動眈歌。顧影慚駢服。載筆旅江沱。縞衣紛可獻。琴言曖已和。青臯向還色。春潤視生波。巖垂變好鳥。松上改陳蘿。日與歲眇邈。歸恨積一作限。蹉跎願緝吳山杜。寧袂楚池荷。清風豈孤劬。功遂懷增阿。勿藥良有賜。荏苒芳未過。幸留清樽味。言藉故田莎。

行園

沈約

寒瓜方臥壘。秋菰亦滿陂。紫茄紛爛漫。綠芋鬱參差。初菘向堪把。時韭日離離。高梨有繁實。何減萬年枝。荒渠集野鴈。安用昆明池。

和沈祭酒行園

清淮左長薄。荒徑隱高蓬。回潮旦夕上。寒渠左右通。霜畦紛綺錯。秋町鬱蒙茸。環梨縣已紫。珠榴拆且紅。君有棲心地。伊我歡既同。何用甘泉側。玉樹望青蔥。

北戍琅邪城

江孝嗣

驅馬一連翩。日下情不息。芳樹似佳人。惆悵余何極。薄暮苦羈愁。終朝傷旅食。丈夫許人世。安得顧心臆。按劍勿復言。誰能耕與織。

和江丞北戍琅邪城

春城麗白日。阿閣跨層樓。滄江忽渺渺。驅馬復悠悠。京洛多塵籍。淮濟未安流。豈不思撫劍。惜哉無輕舟。夫君良自勉。歲暮勿淹留。

昧旦出新亭渚

徐勉

驅車凌早術。山華映初日。攬轡且徘徊。復值清江謠。杳蕩楓樹林。參差黃鳥匹。氣物宛如斯。重以心期逸。春隄一遊衍。終朝意殊悉。

和徐都曹出新亭渚

宛洛佳遨遊。春色滿皇州。結軫青郊路。迴瞰滄江流。日華川上動。風光草際浮。桃李成蹊徑。桑榆蔭道周。東都已倣載。言歸望綠疇。

入琵琶峽望積布磯

劉繪

江山信多美。此地最爲神。以茲峯石麗。重在芳樹春。照爛虹蜺雜。交錯錦繡陳。差池若燕羽。崱峴似龍鱗。

卻瞻了非向前觀。復已新翠微。上虧景清莎。下拂津巖巖如刻削。可望不可親。昔途首遐路。未獲究清塵。誓將返初服。歲暮請爲鄰。

和

昔余侍君子。歷此遊荆漢。山川隔舊賞。朋僚多雨散。圖南矯風翮。曾非息短翰。移疾覲新篇。披衣起淵沔。惆悵懷昔踐。彷彿得殊觀。蘋紫共彬駸。雲錦相凌亂。奔星上未窮。驚雷下將半。回潮潰崩樹。輪囷軋傾岸。巖篠或傍翻。石筍無修幹。澄澄明浦媚。衍衍清風爛。江潭良在目。懷賢興累歎。歲暮不我期。淹留絕巖畔。

在郡臥病呈沈尚書

淮揚股肱守。高臥猶在茲。況復南山曲。何異幽棲時。連陰盛農節。蠶笠聚東菑。高閣常晝掩。荒階少諍辭。珍簟清夏室。輕扇動涼颺。嘉魴聊可薦。綠蟻方獨持。夏李沈朱實。秋藕折輕絲。良辰竟何許。夙昔夢佳期。坐嘯徒可積。爲邦歲已基。絃歌終莫取。撫机一作枕今自嗤。

答謝宣城

沈約

王喬飛鳧鳥。東方金馬門。從宦非官侶。避世不避喧。揆余發皇鑒。短翮屢飛翻。晨趨朝建禮。晚沐臥郊園。賓至下塵榻。憂來命絲樽。昔賢侔時雨。今守馥蘭蓀。神交疲夢寐。路遠隔思存。牽拙謬東汜。浮惰反西崑。顧循良非薄。何以儷瓊璠。將隨渤澥去。刷羽汎清源。

和何議曹郊遊二首

春心澹容與。挾弋步中林。朝光映紅萼。微風吹好音。江垂得清賞。山際果幽尋。未嘗遠別離。知此愜歸心。流沂終靡已。嗟行方至今。江臯倦遊客。薄暮懷歸者。揚舲浮大川。惆悵至日下。蠶靡青莎被。潺湲石溜瀉。寄語持笙簧。舒憂願自假。歸途豈難涉。翻同江上夏。

和劉西曹望海臺

滄波不可望。望極與天平。往往孤山映。處處春雲生。差池遠鴈沒。颯沓羣鳥驚。羃塵及簿領。棄捨出重城。臨川徒可羨。結網庶時營。

和王中丞聞琴

涼風吹月露。圓景動清陰。薰氣入懷抱。聞君此夜琴。蕭瑟滿林聽。輕鳴響湖音。無爲澹容與。蹉跎江海心。

和伏武昌登孫權故城

炎靈遺劍璽。當塗駭龍戰。聖期闕中壤。霸功興寓縣。鵠起登吳臺。鳳翔陵楚甸。襟帶窮巖險。帷帟盡謀選。北拒溺鏖鏖。西戡一作收組練。江海旣無波。俯仰流英眇。裘冕類禋郊。卜揆崇離殿。釣臺臨講閱。樊山開廣讌。文物共葳蕤。聲明且蔥蒨。三光厭分景。書軌欲同薦。參差世祀忽。寂寞市朝變。舞館識餘基。歌梁想

遺轉一作故林衰木平。荒池秋草遍。雄圖恨若茲。茂宰深遐睠。幽客滯江臯。從賞乖纓弁。清卮阻獻酬。良書限聞見。幸藉芳音多。承風采餘綯。于役倘有期。鄂渚同遊衍。案吳璠本作吳山。今從顏氏家訓。

夏始和劉孱陵

威仰弛蒼郊。龍躍表皇隰。春色卷遙甸。炎光麗近邑。白蘋望已騁。細荷紛可襲。徒願尺波旋。終憐寸景戡。對窗斜日過。洞幌鮮魃入。浮雲去欲窮。暮鳥飛相及。柔翰緝芳塵。清源非易揖。迴江難絕濟。云誰暢佇立。良宰勸夜漁。出入事朝汲。績羽余旣裳。更賦子盈粒。椅梧何必零。歸來共棲集。

和宋記室省中

落日飛鳥還。憂來不可極。行樹澄遠陰。雲霞成異色。懷歸欲乘電。瞻言思解翼。清揚婉禁居。祕此文墨職。無歎阻琴樽。相從伊水側。

和王著作融八公山

二別阻漢坻。雙嶠望河澳。茲嶺復噴旡。分區奠淮服。東限琅邪臺。西距孟諸陸。阡眠起雜樹。檀欒蔭修竹。日隱澗疑空。雲聚岫如複。出沒眺樓雉。遠近送春目。戎州昔亂華。素景淪伊穀。阨危賴宗袞。微管寄明牧。長她固能翦。奔鯨自此暴。潘下道峻芳塵流。業遙年運儵。平生仰令圖。于嗟命不淑。浩蕩別親知。聯翩戒征軸。再遠館娃宮。兩去河陽谷。風煙四時犯。霜露一作朝夜沐。春秀良已凋。秋場庶能築。

和王主簿季哲怨情

掖庭聘絕國。長門失歡宴。相逢詠靡蕪。辭寵悲團扇。一作花叢亂數蝶。風簾入雙燕。徒使春帶賒。坐惜紅
妝變。平生一顧重。宿昔千金賤。故人心尙爾。故人不見。一作故人
心不見。

贈王主簿二首

日落窗中坐。紅妝好顏色。舞衣襞未縫。流黃覆不織。蜻蛉草際飛。遊蜂花上食。一遇長相思。願寄連翩翼。
清吹要碧玉。調絃命綠珠。輕歌急綺帶。含笑解羅襦。餘曲詎幾許。高駕且踟蹰。徘徊韶景暮。惟有洛城隅。

同王主簿有所思

佳期期未歸。望望下鳴機。徘徊東陌上。月出行人稀。

落日同何儀曹煦

參差複殿影。氛氳綺羅雜。風入天淵池。菱荷搖復合。遠聽雀聲聚。回望樹陰杳。一賞桂尊前。寧傷蓬鬢頽。
和紀參軍服散得益

金液釋九轉。西山歌五色。鍊質乃排雲。濯景終不測。雲英亦可餌。且駐羲和力。能令長卿臥。暫故遇真諷。

新治北窗和何從事

國小暇日多。民淳紛務屏。關牖期清曠。開簾候風景。泱泱日照溪。團團雲去嶺。岩嶢闌撩峻。駢闐石路整。

池北樹如浮。竹外山猶影。自來彌弦望。一作及君臨箕穎。清文蔚且詠。微言超一作怡。已領不見城壕側。思君朝夕頃。迴舟方在辰。何以慰延頸。

同羈夜集

積念隔炎涼。驥言始今夕。已對濁樽酒。復此故鄉客。霜月始流砌。寒蟬早吟隙。幸藉京華遊。邊城讌良席。樵采咸共同。荆莎聊可籍。恐君城闕人。安能久松柏。

謝宣城詩集卷第五

奉和隨王殿下

其一

玄冬寂修夜。天園靜且開。亭皋霜氣愴。松宇清風來。高琴時以思。幽人多載懷。幸藉汾陽想。嶺首正徘徊。

其二

高秋夜方靜。神居肅且深。閑階塗廣露。涼宇澄月陰。嬋娟影池竹。疎蕪散風林。淵情協爽節。詠言興德音。闢道空已積。遷直愧蓬心。

其三

愴愴緒風興。祁祁族雲布。嚴氣集高軒。稠陰結寒樹。日月謬論思。朝夕承清豫。徒藉小山文。空揖章臺賦。

其四

星回夜未艾。洞房凝遠情。雲陰滿池榭。中月縣高城。喬木含風霧。行鴈飛且鳴。平臺盛文雅。西園富羣英。芳慶良永矣。君王嗣德聲。眷此伊洛詠。載懷汾水情。願已非麗則。恭惠奉仁明。觀淄詠已失。慙然愧簪纓。

其五

蕭景遊清都。修簪侍蘭室。累榭疎遠風。廣庭麗朝日。穆穆神儀靜。惜惜道言密。一冷繁靈表。無吝科年歷。

其六

神心遺魏闕。沖想顧汾陽。蕭景懷辰豫。捐玦翦山楊。時惟清夏始。雲景曖含芳。月陰洞野色。日華麗池光。草合亭泉遠。霞生川路長。端坐聞鶴引。靜瑟愴復傷。懷哉泉石思。歌詠鬱瑤相。塘春多迭駕。言從伊與商。衰職眷英覽。獨善伊何忘。願輟東都遠。宏道侍云梁。

其七

清房洞已靜。閑風伊夜來。雲生樹陰遠。軒廣月容開。宴私移燭飲。遊賞藉琴臺。風猷冠淄鄴。枉烏愧唐枚。

其八

方池含積水。明流皎如鏡。規荷承日炫。影鱗與風泳。上善叶淵心。止川測動性。幸是芳春來。側點游濠盛。

其九

浮雲西北起。飛來下高堂。合散輕帷表。飄舞桂臺陽。遙階收委羽。平池如夜光。眷言金玉照。顧慚蘭蕙芳。

其十

容心重離垢。近刻作析岐路清江隈。四面寒飈舉。千里白雲來。川長別管思。地迴翻旗回。還顧昭陽闕。超遠章華臺。置酒巫山日。爲君停玉杯。

十一

桂樓飛絕限。超遠向江岐。輕雲霽廣甸。微風散清漪。連連絕鴈舉。眇眇青煙移。嚴城亂芸草。霜塘凋素枝。氣爽深遙矚。豫永聊停曦。印一作已終可悅。盈思且若斯。

十二

炎光闕風雅。宗霸拯時淪。龍德待雲霧。令圖方再晨。歲遠荒城思。霜華宿草陳。英威邈如是。徘徊岐路人。

十三

念深沖照廣。業闡清化元。端儀穆金殿。敷教藻瓊筵。船湛輕帷藹。磬轉芳風旋。卷轡栖道樹。方津棹法舷。歸興憑大造。昭塗良易筌。

十四

分悲玉瑟斷。別緒金樽傾。風入芳帷散。缸華蘭殿明。想折中園草。共知千里情。行雲故鄉色。贈子一離聲。

十五

年華豫已滌。夜艾賞方融。新萍時合水。弱草未勝風。閨幽瑟易響。臺迴月難中。春物廣餘照。蘭萱佩未窮。

十六

漣漪映餘雪。嚴城限深霧。清寒起洞門。東風急池樹。神居望已肅。徘徊舉沖趣。栖歸如遲宋作歸姑。從近刻此款。

邱山不可屢。

詠風

徘徊發紅萼。葳蕤動綠旒。垂楊低復舉。新萍合且離。步檐行袖靡。當戶思衿披。高響飄歌吹。相思子未知。時拂孤鸞鏡。星鬢視參差。

詠竹

前窗一護竹。青翠獨言奇。南條交北葉。新筍雜故枝。月光疎已密。風來起復垂。青扈飛不礙。黃口得相窺。但恨從風籟。根株長別離。

詠薔薇

低枝詎勝葉。輕香幸自通。發萼初攢紫。餘采尙霏紅。新花對白日。故蕊逐行風。參差不俱曜。誰肯盼微叢。

詠蒲

離離水上蒲。結水散爲珠。閒廁秋菡萏。出入春鳧雛。初萌實雕俎。暮蕊雜椒塗。所悲塘宋作金軀。上曲。遂鑿黃

詠兔絲

輕絲旣難理。細縷竟無織。爛漫已萬條。連綿復一色。安根不可知。縈心終不測。所貴能卷舒。伊用蓬生直。

詠落梅

新葉初冉冉。初蕊新霏霏。逢君後園讌。相隨巧笑歸。親勞君玉指。摘以贈南威。用時插雲髻。翡翠比光輝。日暮長零落。君恩不可追。

遊東堂詠桐

孤桐北窗外。高枝百尺餘。葉生既婀娜。葉落更扶疎。無華復無實。何以贈離居。裁爲圭與瑞。足可命參墟。

詠牆北梔子

有美當階樹。霜露未能移。金蕢發朱采。映日以離離。幸賴夕陽下。餘景及西枝。還思照淥水。君階無曲池。餘榮未能已。晚實猶見奇。復留傾筐德。君恩信未貲。

同詠樂器

琵琶

王融

抱月如可明。懷風殊復清。絲中傳意緒。花裏寄春情。掩抑有奇態。淒鏘多好聲。芳袖幸時拂。龍門空自生。

篪

沈約

江南簫管地。妙響發孫枝。殷勤寄玉指。含情舉復垂。雕梁再三繞。輕塵四五移。曲中有深意。丹誠君詎知。

琴

洞庭風雨榦，龍門生死枝。雕刻紛布濩，冲嚮鬱清危。一作春風搖蕙綺。一作草。秋月滿華池，是時操別鶴。淫淫客淚垂。

同詠坐上器玩

竹檳榔盤

沈約

梢風有勁質，柔用道非一。平織方以文，穹成圓且密。薦羞雖百品，所貴浮天實。幸承歡醕餘，寧辭嘉宴畢。

烏皮隱几

蟠木生附枝，刻削豈無施。取則龍文鼎，三趾獻光儀。勿言素韋潔，白沙尚推移。曲躬奉微用，聊承終宴疲。

同詠坐上所見一物

幔

王融

幸得與珠綴，羃歷君之橙。月映不辭卷，風來輒自輕。每聚金爐氣，時駐玉琴聲。但願置樽酒，蘭缸當夜明。

簾

虞炎

青軒明月時，紫殿秋風日。曠隴引光輝，曖曖映容質。清露依檐垂，蛸絲當戶密。寥開誰共臨，掩晦獨如失。

席

柳惔

照日汀洲際，搖風綠潭側。雖無獨蠶絲，幸有青袍色。羅袖少輕塵，象牀多麗飾。願君蘭夜飲，佳人時宴息。

同前

本生朝夕池。落景照參差。汀洲蔽杜若。幽渚奪江蘼。遇君時採擷。玉座奉金卮。但願羅衣拂。無使素塵彌。
詠竹火籠
沈約
結根終南下。防露復披雲。雖爲九華扇。聊可滌炎氛。安能偶狐白。鶴卵織成文。覆持鴛鴦被。百和吐氛氲。忽爲織手用。歲暮待羅裙。

同前

庭雪亂如花。井水粲成玉。因炎入貂袖。懷溫奉芳褥。體密用宜通。文邪性非曲。本自江南墟。嬾媢修且綠。習承君玉指。請謝陽春旭。

詠鏡臺

玲瓏類丹檻。茗亭似玄闕。對鳳懸清冰。垂龍挂明月。照粉拂紅粧。插花理雲髮。玉顏徒自見。常畏君情歇。

詠燈

發翠斜溪裏。蓄寶宕山峯。抽莖類仙掌。銜光似燭龍。飛蛾再三繞。輕花四五重。孤對一作樹相思夕。空照舞衣縫。

詠燭

杏梁賓未散。桂宮明欲沈。暖色輕帷裏。低光照寶琴。徘徊雲髻影。灼爍綺疏金。恨君秋月夜。遺我洞房陰。

詠郢都故才人嫁為廝養卒婦

生平宮閣裏。出入侍丹墀。開笥方羅縠。窺鏡比蛾眉。初別意未解。去久日生悲。顛頓不自識。嬌羞餘故姿。夢中忽彷彿。猶言承讌私。

詠溪欄

蕙草含初芳。瑤池暖晚色。得廁鴻鸞影。晞光弄羽翼。

聯句

阻雪

積雪皓陰池。北風鳴細枝。九達密如繡。何為遠別離。颼風庭舞流霰。冰沼結文澌。飲春離以燠。欽賢紛若馳。江秀才珠奕條閒響。玉霽檐下垂。杯酒不相接。寸心良共知。王丞飛雲亂無緒。結冰明曲池。雖乖促席讌。白首信勿虧。王閣陵僧穩飄素瑩簷溜。嚴結噎通岐。鱗鱗如未澣。況乃限音儀。謝洗馬吳原隰望徙倚。松筠竟不移。隱憂蔥萱樹。忘懷待山巖。謝中郎緩初昕逸翮舉。日昃鴛馬疲。幽山有桂樹。歲暮方參差。沈右率約

還塗臨渚

淥水纈清波。青山繡芳質。落景皎晚陰。殘花綺餘日。何從白沙澹無際。青山眇如一。傷此物運移。惆悵望

還律吳郎白水田外明。孤頂松上出。卽趣佳可淹。淹留非下秩。府君

紀功曹中園

蘭庭仰遠風。芳林接雲嶠。傾葉順清飈。修莖佇高鶴。何從連綿夕雲歸。曖曖日將落。寸陰不可留。蘭蕕豈
停酌吳郎丹櫻猶照樹。綠筠方解籜。求志能兩忘。卽賞謝邱壑。府君

閑坐

雨洗花葉鮮。泉漫芳塘溢。藉此閑賦詩。聊用蕩羈疾。陳郎霰霖微雨散。葳蕤蕙草密。預籍芳筵賞。沾生信昭
悉。紀功曹紫葵窗外舒。青荷池上出。旣闔穎川扇。且臥淮南秩。府君流風薄晚陰。行雲掩朝日。念此蘭蕕客。徒
有芳菲質。何從事

侍筵西堂落日望鄉

沈病已綿緒。一作綿負官別鄉憂。高城悽夕吹。時見國煙浮。曹丞漠漠輕雲晚。颯颯高樹秋。鄉山不可望。蘭厄
且獻酬。府君旻高識氣迴。泉停知潦收。幸遇慶延渥。方旦一作將沐恩猷。紀功曹芸黃先露早。騷瑟一作驚暮秋。
舊城望已肅。況乃客悠悠。何從事

祀敬亭山春雨

水府衆靈出。石室寶圖開。白雲帝鄉下。行雨巫山來。府君歌風讚靈德。舞蹈起輕埃。高軒乍留吹。玄羽或徘徊。

徊何從福降羣仙下。識逸百神該。青鳥飛層隙。赤鯉泳瀾隈。齊舉

往敬亭路中

山中芳杜綠。江南蓮葉紫。芳年不共遊。淹留空若是。君府淶水豐漣漪。青山多繡綺。新條日向抽。落花紛已委。何從弱蔓既青翠。輕莎方薶靡。鶯鵝沒而遊。鷹鷂騰復倚。齊舉春岸望沈沈。清流見瀾瀾。幸藉人外遊。盤桓未能徙。陳鴛榭把瓊芳。隨山訪靈詭。榮楯每嶙峋。林堂多碣礧。君府

案直齋書錄解題云。謝宣城集原本十卷。宋樓照知宣州。止以上五卷賦與詩刊之。下五卷皆當時應用文字。衰世之事。可采者已見本傳及文選。餘視詩劣焉。以爲雖無傳可也。故今宣城集止五卷。明時有數刻。予所見嘉靖丁酉任邱黎晨刊本。其間紕繆舛錯殊多。又正德辛未康海序劉紹刊本。以爲世本隨王鼓吹曲與樂府多差謬。不知其所謂勘正本。差謬正復不少。如鼓吹曲中第一首芳樹。乃誤以再賦者次于前。他人詩或在再和中者。亦誤次于前。并以王融之巫山高爲宣城詩。而第五卷中同咏樂器。坐上器物諸篇。溷亂錯謬。尤不勝更僕數。至明人集錄。漢魏六朝諸集。固無論也。去秋偶從盧紹弓學士借得舊藏宋本。視明刻迥異。因卽授剞劂。刊入懋谷叢書。惜梓垂成。而學士已歸道山。不及更相與訂其亥豕矣。昔人評三謝詩。元暉差薄。近有唐風。顧予讀宣城集。尤不能無槩于中者。昔鄭雍糾妻祭仲女。厲公與謀殺仲。爲婦所泄而死。讀春秋者猶憐之。朏之告王敬則。要亦迫于事之所不得已。然敬則之敗甫踰年。而朏亦誅死。豈非天哉。夫士生衰世。不幸又遇懿戚之變。故宜高舉遠引。以避其禍。朏旣昧乎明哲保身之誠。徒貽刑于寡妻之譏。顧其詩有曰。雖無元豹姿。終隱南山霧。何竟不能自踐其言邪。因取本傳冠諸集端。而爲之跋。

嘉慶元年春王正月十有八日。吳騫槎客氏。

跋

謝公詩名重天下。在宣城所賦爲多。故杜少陵以謝宣城稱之。在宣城宜有公之集矣。後公六百五十餘年。樞密樓公始克鈐之。木距今又六十四年。字畫漫毀。幾不可讀。是用再刻於郡齋。以永其傳。嘉定庚辰冬十二月望。鄱陽洪伋識。

予以嘉慶丙辰重梓宣城集。用盧學士依宋校本。明年夏過吳趨顧千里茂才。爲言黃羹圃孝廉有兩宋本宣城集。俱佳。羹圃因卽錄其序跋目錄見遺。予喜過望。細讀之。蓋卽陳直齋所云東陽樓炤原本。而鄱陽洪伋嘉定庚辰重刻者也。宋本全書體格較此稍異。每葉二十行。行十八字。目次行款亦多不同。亟取序跋補刊八集。并書顛末。以著良友之惠云。丁巳天中前一日齋載跋。